

Kuldusaxa

Kuldusaxa zaldakuetshi kalta zuñgajienapanaldiamak

Meja ai kalta gauwane: Pábulduki Duwe Jesúja ají múldigaba guaxal gaxaneja jalde kaltaki gauwane. Aldéñki kuíbuldu Aldumaxa kalseldi izhoshi zhinik jalde gauwane ajañguxa. Akldé Pábuldu shaldaga miñkualdaldiamake “Aldumaxa zaldakuetshi kalta zuñgajienapanaldiamak” gaune tuakue.

Mekuetshi kalta gauwane: Pábulduja Duwe Jesú ipanane kuíbuldu Kuldusaxa ishjuizhaldekakue jalde kalta kakuzgauwane. Kuldusaki Asia baxega nuka. Eñguiñki akldé juldiú saná naldagáldekue zhekueñka. Pábulduja kuíbuldu Epesuxa Duwe shalda guagatogats Haga, ezua sigí Epapalda Duwe ipaná guñguenik Pábulduja akldé akldéñga Duwe shalda shaxaldiyane (1.7-8; Ajsh 19.10). Nalguák Pábulduja naldi Duwe shalda Kuldusaxa kakbeyazháne naldatshak, Epapalda exa zalda (4.12) nalguakna Duwe shalda kakbeyatshak namak ajañgui, iyapaná.

Jinak ai kalta gauwane: Epapaldajañki Kuldusaxa zaldakue Duwe zunekuanane shalda namak shi kaxaldiyane nalgué, anuñka naldagálde shizhixakue naldagálde shi kaxaldiyaldiamak Kuldusaxa aldé. Guatshake Epapaldaki Pábuldu kalseldi izhogualdi tual neyatshak, naldagálde shizhixakue shalda akbeyá. Ekí nukañguakna Pábulduja Kuldusaxa zaldakue naldagálde ne jian kakzukuazháldiamak, mokue namakldega ajañgualdiamak jalde kalta kagakauwane.

Ji, ji shalda guashi jalde kalta gaune:

1. Kasak misha ji shalda kakkbene (1.1-2)
2. Kuldusaxa zaldakue Jatek kakbeñka (1.3-14)
3. Duwe Jesú za akaldak akaldak akzé izhuka (1.15-23)
4. Pábulduja Duwe ipananekue kaxazañka (1.24-2.7)
5. Duwe Jesú za abisajañ zanakukshixa (2.8-23)
6. Duwe Jesú ipananekueki mitsabé izhogakue (3.1-4.6)
7. Aldiwe kakkbene (4.7-18)

Pábulduja Kuldusaxa

zaldakuek kalta kakuzgaune

1 ¹Naski Pábuldu Saldiñga netshi Jateja jañguamak Asukuá Duwe Jesú Zunekualkajañki ají múldigaba guaxal nakaxanek kalta miñkuzgauwatokuge. Amak miñgakauwatoxaldatshak, Timuteyu, Duwe Jesúk zhinik nauwikaja nekldeja ekíga mimajañguxá ni mimakuák. ²Maiñ Kuldusaxa zalda Duwek zhinik nauwikajakue kalta miñkuzgauwatokugeki, Duwe Jesúja ají giemi mimaldekshane, ek za abá naldakí agapa mineñkakue.

Saldiñga netshi Jate Nauwijatega atemajañ éegaba guañ mimajañgui, muldetua aldunaxa señgaba miñzukui shi mimezhokshí.

Kuldusaxa zaldakue Jatek kakbeñka

³Guatshak nasuñki Saldiñga netshi Jate nauwijí Sáñkalda Duwe Jesútshi Ajatek kabiñmeyauxa, maiñ shalda “zeñ nzhakldék” kakbeñka. ⁴Jinake naldakí. Maiñ Duwe Jesú Zunekualka alduna mishixa, saldiñga aldéñ ipananeke muldetua izhgajañgui mizhekue nukáñkalde nak. ⁵Sakí zhinik ekí mizhekue naldakí. Maiñ Duwe Jesú zunekuane shalda múldigaba namaklde minukatshak, e ipanañkaldekuañki Jateja jékaldaxa janshizhe zueñkatshaldixa^a janazueñgaktune nukamine. Ekí minukajéñ zhinik na, “Jateja ekíga naxatshaldixa shakldá” jañgui jiaktuwi mizhekue nak.

⁶Akze, Duwe zunekuane shalda saldiñga kagi nahauxa ashekuekuek kagabeyatogamakga, maiñ jiaga miñgabene. Kasak ekí Duwe shalda minukatshak, Jateja éegaba guañ mimajañguxá miñgajienatshak namak jañgui mipangueni zhinik na, Jateja mimajañguamak abisajañ izhogapanamine. Ekibeñga saldiñga Duwe ipanane kagi nahauxa ashekuekue jiaga akldé akldéñga Jateja kajañguamak izhogapananeke. ⁷Ai múldigaba Duwe zunekuane shaldaki, Epapalda kizhgajañguxaja miñmeyanane. Aldéñki nasuñ nañga Duwe Jesú abá naldakí axazauwi izhoshi, maiñ miñgauneshi izhuka.^b ⁸Aldéñki exa zhinik jai nagatshak Duwe ipanaminekuañgaba Jatetshi Aldunaja sakí ajañgui mimezhokshatuka ni zueñmé.

⁹Ekí maiñ shalda kaldukatshak zhinik na, abá naldakí Jatek ekí mimakbeyañkalduka: Jateja aldéñ shalda muldetua miñgajieñgui, miñwashekuéñ zhinik na, mimajañguauxa muldetua

^a 1.5 1Pe 1.4 ^b 1.7 Kls 4.12; Plm 23

miñwashekualdiamak. ¹⁰ Ekíki maiñ nauwijí Sáñkaldatshi nekbinekuañki mitsabé izhogakue miñgatsauxabé zhekualdi na, saldiñga miyatshauxa Duwek akldunamak mizhekualdaldiamak. Ekíga na, axautshikuek saldiñga nalda janshizhe kaxatshalga mizhekualdaldiamak, Nauwijate akldé akldéñga “me ne” miñwasheshi, miyaxabaldexaldiamak mimakbeji kizhuka. ¹¹ Ekíga na, Nauwijate za guagasá atemajañ kama axaldé izhogakna, aldunaxa kama mimezhokshaldiamak mimakbeji kizhuka. Ekíki jibañ tuabinogéñ jiaga abá naldakí, egaba abeti mizhekualdaldiamak. Ekíga, zeñ miñneshi ¹² Jatek “zeñ nzhakldék” akbeyal minoxaldiamak. Akze, aldéñki ají nekaldekuañ jékaldaxa muñshí zeñka bieni jana matshuwi janshizhe zññkatshaldixa janazññgaktune nakna, ajíkie mimaldekshanéñ zhinik ajíkuañki ipanakue zññgatsahamakga mipanaldixakue.

¹³ Guatshak axañgaki jisé za zññsaneka tuañ zñnezguane kizhoguakna, Jateja jisék zñnebesanshatshak, Asukuá Duwe Jesú izhgajañguxa niñkauwañki zññsanekshapanane. ¹⁴ Akze, Duweki [shuigatshak abi akzuldí] sha katshixa zñnesabiyatshakna Ajateki jisék zñnebesanshi, sha katshixa zññkabetixa nakldá.^c

Duwe Jesú za akaldak, akaldak akzé

¹⁵ Guatshak Saldiñga netshi Jateki ubak naldi tuazhánazñnaka naldatshak, Asukuá Duwe Jesúke aldéñ agatsauxabé izhogakna sakí agatsé zñnatsuñshixa. Akze, Duweki saldiñga jika na nahauxa gauwanekue guashiñki zhaxañga zalda, ekue zhakaldak akzé, kaksaneka niuwi aksuikue nakldá. ¹⁶ Akze, Jateja saldiñga jika na nahauxa Asukuák ga gauwanane. Ek ga saldiñga jika kagik zaldakue, jékaldaxa zaldakue jiaga gauwanane. Amak gauwatshak ubak tunazñnakakue, tuazhánazñnakakue jiaga gauwanane. Ekí gauwatshak alduna akldé akzekue, saldiñga sanék gua niuwi axaldekue, sakígaba sanekakue, Jateja guaklde uldeñkakue jiaga gauwanane. Akze, Jateja Asukuá Duwe Jesúk ga saldiñga gauwanane. Ekíki saldiñgaja Asukuá za akaldak akaldak akzamakga agazukualdiamak. ¹⁷ Duweki ni ji naldakí nalgueña jiaga, aldéñgaba izhoshi na, saldiñga jika na nahauxa nogakuauxabé nalshi naldatuka nakldá.^d ¹⁸ Ekíga na, abua sáñkaldaja aksanegamak Duwe Jesúki nauwijí Sáñkaldala aldéñ ipanañkaldekuañki ají abua zññsaneka.^e Aldéñ za na ajíkuañ abisajañ zñnezhokshixa, aldéñga na shuigueni kasaklde mokue shuigazhíta izhgate.^f Ekíki saldiñga na nahauxa zhakaldak akzé izhoxaldiamak. ¹⁹ Akze, Saldiñga netshi Jateja Asukuák za na aldéñ agatsauxa ne izhoxaldixa izhgakuxa guane. ²⁰ Ekíga na,

^c 1.13-14 Ep 1.7; 6.12 ^d 1.15-17 Jñ 1.1-3; Eb 1.2-3 ^e 1.18 Ep 1.22-23; 4.15

^f 1.18 Ajsh 26.23; Aux 1.5

saldiñga jika gauwane na nahauxa, alnobaxa zaldakue, kagik zaldakue jiaga, Asukuák ga aldéñ na mokue ishkaakualdixa izhgakuxane. Akze, Jateja Asukuá abi akzaldi kaldixa axaldi shuanéñ zhinik na saldiñga ishkaakui, aldéñ na señgaba zhe noxaldiamak izhgakuxane nakldá.^g

²¹Maiñ axañgaki Jatek agajué zhekualdabinoguéñ sha jañgui, kutám atshalga mizhekualguakna, aldunaldiñki Jate miñguldiñka namine naldashá. ²²Ekí mizhekualdatshak jiaga, kaigaki Jateja Asukuá mimitsaldí abuák shuixal gaxanéñ zhinik na, aldéñ na mimeshkaakuane. Ekíki niuwizhíne aldéñ nugeñka mimauldeyatshak, janshizhe, ni meja miñgatsé ne mimakuagakí, sha atshabíne jana mimatualdiamak. ²³Naldatshak ekí mimatualdiamake, abá naldakí Duwe Jesú minkuanamak alduna ishál za nogakue. Akze, ni nauwa ijuldú naldakí, aldéñ za agapa neyal noshi na, aldéñ ipanañkaldekuañki niuwizhíne janshizhe zañkatshaldixa zañmenane “amak naxatshaldixaga shakldá” jañgui, jiaktuakue. Guatshak Duwe Jesú zañekuane shalda múldigaba nukaminega na káguba zhekuauxa kagabeyaldá na gu. Aiga na nas jiaga Jate axazauwi guakuge nakldá.

Pábulduja Duwe ipanekue kaxazauñka

²⁴Guatshak miñgaunexaldikuamake guiyaba tuatokuge shaldaki zeñ nakldeka. Akze, Duwe Jesú guiyaba tunamak, aldéñ ipanekue ají abuá jana nekue kagaunexaldikuamak, mitsá nají abuák guiyaba tuakue nezhgakuxanauxa tuwi isugakuatokuge. ²⁵Akze, saldiñga Duwe ipanekue kaxazauwi izhokuge. Jinake ekí izhogakí. Saldiñga netshi Jateja ají múldigaba guagauxa miñmeyaldikuamak nezhgakuxane nak.^h ²⁶Ai múldigaba miñmeñkugéki, Jateja kasak zhinikga mu zañgisekuazháne ne, kaigaki ají giemikuañ ekí mu zañgisekuá guane. ²⁷Akze, Jateja juldiú saná naldagáldekue jiaga zuxaita janshizhe na zeñ kajañgualdixa janakaktune mu zañgisekualdixa zúnajañguane. Aiga na, Asukuá Duwe Jesú mimijí aldunaldi izhogéñ zhinik, niuwizhíne jékaldaxa aldéñ na muñshí zeñka zunezhokshaldixa zañmene, “amak naxatshaldixaga shakldá” jañgui za jimiyaktualdixa nakldá.

²⁸Ekí nakna, Duwe Jesú zañekuane shalda saldiñga sanákuek kakhbeañkaldogéñ, ek agapa neyakue kaksaneshi na, muldetua kishkué ga agatsaldi e shalda shi kaxaldiji kizhuka. Ekíki niuwizhíne saldiñga Duwe ipanekue Jatek kakuldeyatshak aldunaxa auxabé guildek guanekue katualdiamak. ²⁹Akze, amak kauldeyaldikuamak, Duwe Jesúja ají kama zuxaitsha ne nagegatshak aldunaxa kama nakukshi na, nagatsauxa kama ilshiji, jiba atshijiñgaba izhokuge nzha.

g 1.20 Ep 1.10; 2.16 h 1.25 Ep 3.2,7-8

2 ¹Ekíga na, Duwe Jesú ipanaminekue mimijí kuíbulduxa zaldakue, Aldauldiseyaxaⁱ zaldakue, saldiña natuazhánekue juizhiña miñgaunexaldikuamak nagatsauxa kama ilshiji, jiba atshalga izhokuge miñkualdakue ni mimajañgukú. ²Jinak ekí kama ilshakí. Saldiña Duwe ipanaminekue aldunaxa miñguildexaldiamak, zhualduxa ajañgui mizhekuéñ zhinik na askimimé mizhekualdaldiamak. Ekíga na, Jateja axaña mu zñgisekuazháne ne, kaigaki ai mu zñgisekuatukaki zeñ mimajañgui, muldetua auxaga miñgajienane miñkualdaldiamak. Jateja ekí mu zñgisekuatukaki Duwe Jesú Zñnekualkaga nakldá. ³Akze, Jate zuxaita ishkué nahauxa ne, saldiña nalda mikualdakue nahauxa ne, eñki akzegaba naldatshak Duwe Jesúja za na migajieñguaka nakldá.

⁴Guatshak ezuakueki naldagálde nuxa jian miñgazukualdiamak múldigaba akzé ga agatsaldí miñgabeyatshak mimeyajuldukshazháldiamak jañgui na ekí miñmeñkú. ⁵Naski maiñ na izhogakí naldaldatshak jiaga, aldunake maiñ naña izhoshi, minjani ni izhokú. Akna, naldakuauxabe zhekualdi, Duwek abá naldakí alduna ishál mizhekue minakualdatshakna zeñ nakldeshi ni izhokú.

Duwe za abisajañ zñnakukshixa

⁶Akna Duwe Jesú shalda miñgabeyatshak namak jañgui aldéñki mimijí Sáñkalda ipanaminamak, e ipananeke mitsabé izhogakue nake, amak izhoxalga minoxaldí. ⁷Ekí izhoshi na, kaldí guildexaldiamake shijualda juit zeñka jieñguamakbe, mimijí alduna Duwek muldetua jieñgui, alduna ishiji miñgualdí. Akze, Duwe Jesú alduna ishakue shi miñkaldiyane aklde akldéña alduna ishalga minoxaldí. Ekí noshi na, miñgatsauxa Jatek “zeñ nzhakldék” akbeyalga za mizhekualdaldí.

⁸Guatshak ezuakuejañki naldagálde nuxa namak mimajañgushaldiamak múldigababata, kagik zalda mikldexa za shi miñkaldixa. Ekí shi miñkaldiji na, kauwibamakuexa zhinik akuashi aldagatuka, jai kagike mielde atshá makuatshak jika naldakuauxabé naldaldiamake atsha za shi miñkaldixa. Ekuuki Duwe Jesú zñnekuane shalda shi miñkaldiyazhánamak za shi miñkaldixa nak, jian miñzukuazháldiamak muldetua numañ miyatualdí.

⁹Akze, Duwe Jesú ixagabaldekldeki Saldiña netshi Jate muldetua agatsauxa ek izhuka. ¹⁰Ekíga na, maiñ Duwe mipanéñ zhinik na aldéña aldunaxa ni ji jue naldakí, miñgajuezhaxa mimezhokshixa. Akze, Duwe za na Saldiña netshi Sáñkalda izhogakna, saldiña sanék gua niuwi axaldekue, sakígaba sanekakue kaksaneka nakldá.

¹¹Guatshak juldiú sanákueki nauwa abeñguamak káguba nuxa mimabeñguazháne naldatshak, Duwe Jesú mipanatshakna, aldéñ

ⁱ 2.1 Aux 3.14-22

naldiñga aldunaxa mimabeñguá zhuxañga sha atshindana miñzeka miñgajuekuá guane. ¹²Akze, Duwe namak jañguamine atualdiamak nik mimajaukshatshake, Duwe shuane abegatshaga e nañga mimabexá guane zhuxañga miné.^j Ekíga na, Jateja ají kamak Asukuá shuigueni izhgaldakshane namak jañguaminéñ zhinik, aldéñ Asukuá izhgaldakshanamakga maiñ aldunake abisajañ mimakukshane.^k

¹³Guatshak maiñ juldiú saná naldabínekue Duwe ipanagá minogueña sha atshiji za zhekualdabinogueñ, aldunaldiñki shuamine jana namine. Atshak Duweki sha atshindana miñzeka miñgajuekuagá nogueñki, ai za miñsaneka nane. Ekí mizhekualgué jiaga, Duwe mipanatsakga, Saldiñga netshi Jateja Asukuá shuigueni izhgaldakshanamakga, aldunak abisajañ mimakukshá guane. Aldéñga sha atshañkaldauxaki zũñkabetá guane.^l ¹⁴Ekíga na, sakígaba sha atshañkaldéñ zhinik shaldá zũnduka xalte nalgué jiaga, nuk uba isañguá. Akze, Asukuá Duwe Jesú nauwitsaldí kaldixa axaldi shuigatshaga na, shaldá zũndogueñka auxaga zũnesabiji, uba isañguatshakna shaldá zũndogaksá guane.^m ¹⁵Atshaga na, saldiñga shane sanék gua niuwi axaldekue, alduna shanekue jiaga nuk kama ikugatshakna, Asukuá kaldixa axaldi shuanéñ zhinik kagubiyane saldiñgak katuñshá guane nakldá.

¹⁶Ekí nakna, ji miñgaxák zhinik, azhi ji mitukak zhinik, azhi ji ldiuwañki ji atshakue, saxa abisa nogéñ ji atshakue ajañguéñ atshabíneñ zhinik, azhi izhgasekué ldiuwañ ji atshaminéñ zhinik miñgatsaldi ne miñgabeyatshak kaxaldukabináldi.ⁿ ¹⁷Jinake naldakí. Nuñgáki abuák aksaja neyamak, Jateja sakí zũñkatshaldixa zũnatuñshaldiamak na guiyaba misha zũngenane nak. Ne namak zũñkatshixaki Zũnekualka Duwe Jesúga nakldá.^o

¹⁸Akna ezuakuejañki kauwizhéñ jana atshakí miné shalda miñgatsaldi ne miñgabeyatshak kaxaldukabináldi. Akze, ekueki aguáñ zhikzukuane ga abeldashi na, Jateja guaklde uldeñkakue akldé agazukuxakue. Ekuejañki aldunaldi Jateja jika katuñshazháne ne jiaga katuñshane akuashi na shi miñkaldiyaka niuwi kaxaldé akuaka. Ne kauwizhéñki ji shalda sekuazhikshakue kaxaldaldakí jiaga, axaldáñ jañgui janagatune shalda nuxa zũxaita sekuazhigashixakue. ¹⁹Ekueki Duwe Jesú shalda namaklde jañguaksá, shizhiyaksá guanéñ zhinik na ek agajuezhá guanekue. Akze, Duweki nauwíjí Sáñkaldá, aldéñ ipanañkaldekuañki ají abuákuañ kaldé. Akna abuá agatsauxa sáñkaldaja jiba axatshaldiamak aksanegamakbeñga, aldéñ Jateja aldunaxa guildegakue zũnajañguamak

j 2.12 Ekí guagatshake ezua shuigatshak sha atshindana akzekaja aksanegaksá guamakbé, sha atshindana zũñzeka zũñsanegaksá guxa. ^k 2.12 Alm 6.4 ^l 2.13 Ep 2.1-5
^m 2.14 Ep 2.15 ⁿ 2.16 Alm 14.1-6 ^o 2.17 Eb 10.1

askuí zunalnokshi, muldetua guildegakuaidiamak zũnsaneshi izhuka nakldá.^p

²⁰Guatshak Duwe Jesútshi nekbinekuañki e shuigatshaga maiñ jiaga shua guamine zhuxaŋga minakna,^q jai kagike mielde atsha makuatshak jika naldakuauxabé naldaldiamake atsha miŋgatsaldaksá guane.^r Maiñki kagik zalda naldabiñsá guane ne, çjinak shi kagik zalda atshakue zaŋga miñsanegaka jaŋgualga minók? ²¹Aikueki jiki kaugipa guasúñze, ji gakue izhguajasúñze, jiki juguasúñze miñgabeñka. ²²Ekí miñgabeñkakueki jiba agabeji saldinaldixakuega shalda miñgabeñka. Aiki kágubaja nuxa janaktunamak za miñgasanegatshak kaxaldukakue miñgatsaldakí. ²³Ekí atsha guakuekue miñgabeji miñgasanegatshak, ishkué ga agatsaldi miñsanegakuamak jana miñgasaneka. Jinake naldakí. Kauwizhén nuxa Jate sakí akldé akzukuakue janagatunamak agatsaldi atshakue miñgasaneshi na, axaldán aguán izhabakue, abúa jiaga guiyaba izhgatuñshakue miñgasaneka nak. Naldatshak ekí atsha guakuekue miñgabeñkaki sha atshindana miñzekak miyagubiyaldiamak ni nauwa miñaunegakí naldashá.

Jékaldaxa zalda za jaŋguakue

3 ¹Guatshak Duwe Jesúki shuiguenik Jateja mokue izhgaldakshanamakga maiñ aldunake abisajañ mimakukshane nakna, jékaldaxa Duwe izhogeñka zaldakue za alduna ikaumine mizhekualdaldí. Akze, Duweki Ajate, Saldiŋga netshi Jatega sanegatogeñka jibatshaldi mual akldé akzeñka ité nakldók.^s ²Akna jékaldaxa zalda za alduna mikauwaldí. Ne Jate jaŋguagáldekueja jai kagik ji alduna ikauwamakga zũnake alduna ikauwabináldi. ³Jinake ekí miñmeyakí. Duwe shuigatshaga e naŋga shuamine zhuxaŋga minakna, sakí izhominaneki izhoxabiñsá guane. Ne kaigaki abisajañ kukamine nakna, aldunaldiñki Jate numañ mimatuwi Duwek mimabexane aldén nugeñka mimezhokshatogák.^t ⁴Akze, Duweja aldunak abisajañ mimakukshi, be mimalnokshatogák ek mizhuka.^u Akna e mokue kagik nagatshak zuxaita muñshí zalda awatuatshak, maiñ jiaga ekíga mimawatualdixa nzha.

⁵Ekí nakna maiñki shuane sha atshaksá guamakbé, kagik zaldakue ajanashamak sha atshá jiúñgulde nuk masha miñgualdí. Akna, alduna nusagatse za jaŋgua, misewá naldagálde na askuuldék atsha, abúa na atshá guasúñzamak atsha masha miñgualdí. Ekí atshaminaka mikldexa, sakígaba sha atshindana mikzexa ni nauwa jaŋguabináldi. Ni jikakue saldiŋga mimijígaba naldakue jaŋguabináldi. Azhi ekí mijaŋgualdiák

^p 2.19 Ep 1.22-23; 4.16 ^q 2.20 Alm 6.6-11; Ga 2.19 ^r 2.20 Ga 4.3-5,9 ^s 3.1 Sal 110.1; Mt 22.44; Eb 1.3 ^t 3.1-3 Alm 6.4-11; Kls 2.12-13 ^u 3.4 Ga 2.20; Plp 1.21

zúnake, jikakue niñkauwañki Jate zhakaldak akzukui mishkizhaxaldixa.

⁶ Akze, ekí agatsaldi sha atshakuekue ajanashalga aldogéñ zhinik na, Jateja kaxañ atemajañ guiyaba katuñshaldixa nakldá.^v

⁷ Axaña maiñ jiaga Jate amak axatshakí minogueñgaki, ekíga sha atshá jiúñgulde za atshál nominane naldashá. ⁸ Ne kaiga zúnake, saldiña ekí jiaga sha atshá mashakue miñgatsé: Nusá mikzexa, zuxaitsha mitsaulda, káguba agisaldakue ijana, axautshi nalda aguaxa, zukuak guasúñzamak zukuaxa mashakue.^w ⁹ Ataba atabañ naldagálde ishkazguaxa mashakue.^x Jinake naldakí. Maiñ zhakuá nusagatse itshuimiñnegamak, axáñ sha atshiji mizhekue naneki izhoxabiñsá guamine nak. ¹⁰ Ne Duwe mipanatsshake zhakuá abisa itshualdi guamiñnegamak abisajañ mimakukshane. Jate mimakaune ekí mimakukshatshakna akldé akldenğa aldéñ janamé mimezhokshatuka. Ekíki aldéñ “me ne” muldetua miñwashekilde miyaxabaldexaldiamak.^y ¹¹ Amak abisajañ zúnakukshéñ zhinik na, mieldeki nauwisaná ne, azhi axautshi sanákue ne, mieldeki juldiú saná abeñguamak abeñguane, azhi mieldeki amak abeñguazháne tuakue naldasá. Ekíga na, mieldeki awaxani zalda azhi mieldeki sakí naldakue aksúñze, mieldeki nashi axautshi jiba axatshixa, mieldeki sáñkalda tuakue naldasá. Guatshak akzé tuakueki Duwe Jesú Zunekualka za akaldak akaldak akzé izhuka. Aldéñki saldiña ipanañkaldekuañ nauwíj aldunaldi izhuka nakldá.

¹² Guatshak Saldiña netshi Jate naldi mimezhgakuxane, ají giemi mimaldekshane, aldéñki matshuwi mimajañguiñgaba izhogakna, ekí abisajañ izhogakue: Ataba atabañ zhinik guañ ajañgui, juañ zaldaba za ishkatshakue. Axautshikue mimizhakldé akzé kajañgui, kaxabetakue. Axautshi izhogakue agatsahamak ubaña izhogakí naldaldiák jiaga, abeti miñgualdí. ¹³ Ji zhikldunasúñ mishkatshatshak abetiña izhogakue. Azhi mitsake ezua sha makualdiák, éegaba axabetakue. Akze, nauwíj Sáñkalda Duwe Jesú sha atshamine éegaba miñkabetá me guanamakga, maiñ zhinik jiaga ishketakue miñgatsaldashá.^z ¹⁴ Amak izhoshi na, akldé akzeki maiñgabaga ataba atabañ zhinik ajañgui mizhekualdaldí. Amak ajañgui mizhekualdatshakna, auxaga askuiñgaba ishkalaldakuamak mizhekualdaldixa nzha.

¹⁵ Duwe Jesú za aldunaxa señgaba miñzukui mimezhokshixa nakna, ai señgaba mikzukuakue zaña miñgatsauxa, miyatshauxa miñsanegakue itshani miñgualdí. Akze, Duwe ipanamineke ají abua askimimé jana minakna, Jateja maiñgabaga señgaba zhe minoxaldiamak mimezhgakuxane. Ekí izhoshi na, Jatek “zeñ nzhakldék” akbeyalga za mizhekualdaldí. ¹⁶ Ekíga na, Duwe Jesúja sakí zñmeyane, shi zñnkaldiyane akldé akldenğa shitiji, miñjuizha naldakí ai múldigaba za jañgui mizhekualdaldí. Ekí zhekualdi na, muldetua ishkué ga agatsaldi ataba atabañ zhinik Duwetshi múldigaba shi ishkalddi,

^v 3.6 Ep 2.3 ^w 3.8 Ep 4.29,31 ^x 3.9 Ep 4.22,25 ^y 3.10 Gn 1.26; 2Kt 5.17; Ep 2.10
^z 3.12-13 Ep 4.2,32

sakí amak izhogakue zhiksaneshi, zhikbeyakue. Mimijí aldunaxa Jatek “zeñ nzhakldék” akbendana miñzegatoxaldiéñ, ají Aldunaja miñsanegamak, ají múldigaba na axazubeji, e za akldé akzamakga miyaxazbeyaldí. ¹⁷Ekíga na, sakígaba atshamiñnegauxa, zukuakbiñnegauxa, nauwijí Sáñkalda Duwe Jesú naldashiña agatsaldi za atshiji, zukuashi mizhekualdaldí. Amak zhekualdabinoxaldiéñ nauwijí Sáñkalda Duwe Jesúk zhinik Saldiña netshi Jate “zeñ nzhakldék” akbeyal mizhekualdaldí.^a

Zhuajúk zaldagaba ishkaldaldakue

¹⁸Maiñ munzhi, nauwijí Sáñkalda Duwe Jesú ipanamineke izhogakue miñgatsahamak izhoshi na, “nasewá janshibeña ni naksanexaldí” itshani miñgualdí. ¹⁹Maiñ sigíkuañ, mimisewá muldetua izhgajañgui mizhekualdaldí. Ne, izhgajañguabíne jana agatsaldi axatshiji, kaxañ kaxazguaxabináldí.^b

²⁰Maiñ sukuakue, nauwijí Sáñkalda Duwe Jesúk akldunamak axatshiji na, mimijatekueja kaxatshakue miñsanegauxa amak miyaxatshaldí.^c

²¹Maiñ jatekue, mimijí sukuakue nusá kakzukundana ajanashaksá zeñka kaxaldexabináldí. Azhi ekí miyaxaldexaldiák, jie kakzeshi ajanashazháka ne kakldexaldixa.^d

²²Maiñ nashi, jai kagik mimijí sáñkalda miñkizhukakueja atshakue miñsanegauxa amak miyaxatshaldí. Aldéñ mimatuatogéñ za “janshibé atshixá tiuwi” mimajañgualdiamak amak axatshagábaki, nauwijí Sáñkalda Duwe Jesú axabeti, zhema miñkizhogéñ zhinik na, miñgatsauxa amak kaxatshakue itshani miñgualdí.

²³Sakígaba miyatshatshak, “kágubak nuxa sha axazauwatokú” itshani atshagábaki, “nauwijí Sáñkalda Duwe Jesú sha axazauwi jiba axatshatokú” itshani, miñgatsauxa miyatshaldí. ²⁴Akze, ai shalda nauwijí Sáñkaldaja bieni miñkauwi jana janshizhe miñkatshaldixa miñkué. Miñjuizhanagába, Duwe Jesú nauwijí Sáñkalda guana axazauwabinuka naldashá. ²⁵Ekí ne niñkauwañki, mieldeki sha atshalga noxaldiák, Jateja guiyaba tuakue agatsamak tuñshaldixa. Jinake naldakí. Aldéñki mielde naldaldí, agatsaldi azhi agatsaldakí ne zhualduxa tuakuamak za tuñka nak.^e

4 ¹Guatshak maiñ sáñkaldakue, mimijí nashikue mitsabé kaxatshiji, numañ katuakue miñgatsake auxabé miyaxatshaldí. Akze, maiñ jiaga jékaldaxa Saldiña netshi Sáñkalda, mimijí Sáñkalda miñgiteña nuka miñkualdashá.^f

Guiyaba akldé kakkbene

²Guatshak abá naldakí Jate axazguaxal mizhekualdaldí. Ekí minoxaldiéñ uba zhikldéñshamine, Jatek “zeñ nzhakldék” akbeyal

^a 3.16-17 Ep 5.19-20 ^b 3.18-19 Ep 5.22-33; 1Pe 3.1-7 ^c 3.20 Ep 6.1. Jai múldigaba “sukuakue” guagatshake sukua ajaba, ajateja numañ tuwi agapa izhoxalga nuka guashi naldaka. ^d 3.21 Ep 6.4 ^e 3.22-25 Dt 10.17; Ep 6.5-9 ^f 4.1 Ep 6.9

mizhekualdaldí.^g ³ Amak axazguaxabinoxaldiéñ, nasuñ shalda jiaga zúnakbeji miñgualdí. Ekíki Jateja Asukuá Duwe Jesúk zúnekualdaldixa mu zuñgisekuane akldé guagakualdiamak, aldéñga juwí zuñgakpeshi guxá jana matshuwi nekueja aldukandana kakzukualdiamak. Amak guakugé shalda na jai kalseldi^h nabexane ni izhokú. ⁴ Naski kágubaja nukatogéñ Duwe shalda kagajienakldegamak agatsaldi, guagakue nagatsahamak guaxaldikuamak Jatek minakbeyaldí.ⁱ

⁵ Maiñ Duwe ipanazhánekue na mizhekualdaldíéñ, muldetua jañgua guamine kaxatshakue. Akze, mitsakgaba kauwizhéñ na mizhekualdatshak ekíga miyatshaldí.^j ⁶ Akna, kauwizhéñ na dulda mizhikshatshak, múldigaba nukaté nokldana agatsaldi, janshagatse na za dulda kakshakue. Ekíki ji mijañguxá miñgaldukatshak, ezuak ezuak kakiyokuakuamak kakiyokuakue auxaga miñwashexaldiamak.

Aldiwe kakkbene

⁷ Guatshak Tíkiku,^k Duwek zhinik nauwikaja neklde kezhgajañguxa, jibake nas na askuiñga nauwijí Sáñkalda Duwe Jesú muldetua axazauwal za izhuka. Aldéñki exa neyatshak saldiñga nogatokugauxa miñmeyaldixa. ⁸ Akze, eñki sakí noxañkalduka auxaga miñmeyal, aldunaxa jiaga mimakuiyakshaldiamak jañgui miñgakagatokuge. ⁹ E nañga na, maiñ nañga agatsé Onésimu^l jiaga miñgakaxaldikue. Eñki Duwe ipanane, ek muldetua agapa neñka, kezhgajañguxa. Kauwizhéñki sakí jai zegatogauxa miñmeyaldixa nzha.

¹⁰ Jai kalseldi nagapa izhuka, Aldistalkuja mimajañguxá miñmeyakue ni mimakuák. Malku, Belnabétshi akajaja ekíga miñmeyakue ni mimakuák. Eñki miñkabizhal neyaté mitualdiake, muldetua ipanakue miñmeyanugamak mipanaldí.^m ¹¹ Ezuañki Jesú axezhuka ne, Justu akuakaja jiaga mimajañguxá miñmeyakue ni mimakuák. E maigua nasaná juldiúkue za na, jai nas na kágubakue Jateja kaksanegaka ajañgualdiamak askuí jiba atshiji izhukakueki, muldetua aldunaxa nakuiyakshi izhukakue. ¹² Epapalda maiñ nañga agatsé, Duwe Jesú axazauwi izhukaja jiaga mimajañguxá miñmeyakue ni mimakuák. Aldéñki agatsauxa kama ilshiji, abá naldakí Jatek ekí mimakbeji izhuka: Maiñ aldunaxa guildeshi, Jateja izhogakue mimajañguamak miñwashegatshak, “ekí sha izhogakue na” jañgui, ijuldu naldakí amak za mizhekualdaldiamak. ¹³ Akze, aldéñki maiñ na, Aldauldiseyaxa zaldakue, Eldápuldixa zaldakue juizhi, minjani, miñgaunexaldiamak kama ilshijiñgaba izhuka miñmeyanaka ni tuñkú.ⁿ ¹⁴ Alduka, méldiku kezhgajañguxa, Dema na, mimajañguxá miñmeyakue ni mimakuák.^o

^g 4.2 Alm 12.12; Plp 4.6 ^h 4.3 Plp 1.16; Ep 3.1; 4.1 ⁱ 4.3-4 Ep 6.19-20 ^j 4.5 Ep 5.16
^k 4.7 Ajsh 20.4; 2Tm 4.12; Ep 6.21 ^l 4.9 Plm 10-12 ^m 4.10 Ajsh 12.12,25; 13.13;
 15.37-39; 19.29; 27.2; Plm 24 ⁿ 4.12-13 Kls 1.7; Plm 23 ^o 4.14 2Tm 4.10-11; Plm 24

¹⁵Duwe ipananekeue Aldauldiseyaxa zaldakue, Nimpa, ajúk juizhaldekakue juizhi, nas kajañguge kakbeji miñgualdí. ¹⁶Nas jalde kalta miñkuzgauwatokugeki, exa saldiña minekuañ minukaldiamak miñkagazukuakshakue. Gualdini Duwe ipananekeue, Aldauldiseyaxa juizhaldekakuek ekíga kaxagazukuakshaldiamak kakbeji, kakuzgauwa miñgualdí. Ekíga jiak, exa kalta kakuzgauwanuge niñkauwañki maiñ zukuakshi miñgualdí.

¹⁷Alkipuk ekí miyakbeyaldí: “Duwe Jesúja jiba maxatshaldixa mezhgakuxane auxaga matshaldí.”^p

¹⁸Guatshak jalde kaltak “mimajañguge” miñmeji asuxake naxáuxaldak naldi miñgitsuñgualdikue.^q Nas jai kalseldiña izhogatokuge be nezhgisekui Jatek nakbeyal minoxaldí.

Saldiña netshi Jate atemajañ éegaba guañ mimajañgualga shi noshí. Ekíga shi naldí.

P 4.17 Plm 2 **q 4.18** Pábuldu jalde kalta ají káuxaldak naldi gauwazhá, ezuak gaushane naldatshak múldigabaki ajíga.